

মেঘনাদবধ কাব্য মাইকেল মধুসূদন দত্ত

নবম সর্গ

৩০ জানুয়ারী ২০০৭

(Last updated: ১৮ ফেব্রুয়ারি ২০০৭)

<http://www.iopb.res.in/~somen/madhu.html>

নবম সর্গ

প্রভাতিল বিভাবরী; জয় রাম নাদে
নাদিল বিকট ঠাট লঙ্কার চৌদিকে।
কনক-আসন ত্যজি, বিষাদে ভূতলে
বসেন যথায়, হায়, রক্ষোদলপতি
রাবণ; ভীষণ স্বন স্বনিল সে স্থলে
সাগরকল্লোলসম! বিস্ময়ে সুরথী
শুধিলা সারণে লক্ষি;—“কহ স্বরা করি,
হে সচিবশ্রেষ্ঠ বৃধ, কি হেতু নিনাদে
বৈরিবৃন্দ, নিশাভাগে নিরানন্দ শোকে?
কহ শীঘ্র! প্রাণদান পাইল কি পুনঃ
কপট-সমরী মূঢ় সৌমিত্রি? কে জানে—
অনুকূল দেবকুল তাই বা করিল!
অবিরামগতি স্রোতে বাঁধিল কৌশলে
যে রাম; ভাসিল শিলা যার মায়াতেজে
জলমুখে; বাঁচিল যে দুইবার মরি
সমরে, অসাধ্য তার কি আছে জগতে?
কহ শূনি, মন্ত্রিবর, কি ঘটিল এবে?”
কর পুটি মন্ত্রিবর, উত্তরিলে খেদে!—
“কে বুঝে দেবের মায়া এ মায়া সংসারে,
রাজেন্দ্র? গন্ধমাদন, শৈলকূলপতি,
দেবাত্মা, আপনি আসি গত নিশাকালে,

মহৌষধ-দানে, প্রভু, বাঁচাইলা পুনঃ
লক্ষ্মণে; তেঁই সে সৈন্য নাদিছে উল্লাসে।
হিমান্তে দ্বিগুণতেজঃ ভূজঙ্গ যেমতি,
গরজে সৌমিত্রি শূর—মণ্ড বীরমদে;
গরজে সুগ্রীব সহ দাক্ষিণাত্য যত,
যথা করিয়ুথ, নাথ, শূনি যুথনাথে!”
বিষাদে নিশ্বাস ছাড়ি কহিলা সুরথী
লঙ্কেশ—“বিধির বিধি কে পারে খঙাতে?
বিমুখি অমর মরে, সম্মুখ-সমরে
বধিনু যে রিপু আমি, বাঁচিল সে পুনঃ
দৈববলে? হে সারণ, মম ভাগ্য দোষে,
ভুলিলা স্বধর্ম আজি ক্তান্ত আপনি!
গ্রাসিলে কুরঙ্গে সিংহ ছাড়ে কি হে কভু
তাহায়? কি কাজ কিম্বু এ বৃথা বিলাপে?
বুকিনু নিশ্চয় আমি, ডুবিল তিমিরে
কর্বুর-গৌরব-রবি! মরিল সংগ্রামে
শূলীশঙ্কুসম ভাই কুম্ভকর্ণ মম,
কুমার বাসবজয়ী, দ্বিতীয় জগতে
শক্তিধর! প্রাণ আমি ধরি কোন্ সাধে?
আর কি এ দৌহে ফিরি পাব ভবতলে?—
যাও তুমি, হে সারণ, যথায় সুরথী
রাঘব;—কহিও শূরে,— ‘রক্ষঃকুলনিধি
রাবণ, হে মহাবাহু, এই ভিক্ষা মাগে

তব কাছে, —তিষ্ঠ তুমি সসৈন্যে এদেশে
 সপ্ত দিন, বৈরিভাব পরিহরি, রথি!
 পুত্রের সৎক্রিয়া রাজা ইচ্ছেন সাধিতে
 যথাবিধি। বীরধর্ম পাল রঘুপতি!—
 বিপক্ষ সুবীরে বীর সম্মানে সতত।
 50 তব বাহুবলে, বলি, বীরশূন্য এবে
 বীর যোনি স্বর্ণলঙ্কা! ধন্য বীরকূলে
 তুমি! শুভ ক্ষণে ধনুঃ ধরিলা, নৃমণি!
 অনুকূল তব প্রতি শুভদাতা বিধি;
 দৈববশে রক্ষঃপতি পতিত বিপদে;
 পরমনোরথ আজি পুরাও, সুরথি।’
 যাও শীঘ্র, মন্ত্ৰি বর, রামের শিবিরে।”
 বন্দি রক্ষঃকূল-ইন্দ্রে, সঙ্গীদল সহ,
 চলিলা সচিবশ্রেষ্ঠ। অমনি খুলিল
 60 ভীষণ নিনাদে দ্বার দ্বারপাল যত।
 ধীরে ধীরে রক্ষোমন্ত্রী চলিলা বিষাদে
 চির—কোলাহলময় পয়োনিধিতীরে।
 শিবিরে বসেন প্রভু রঘুকুলমণি,
 আনন্দসাগরে মগ্ন; সম্মুখে সৌমিত্রি
 রথীশ্বর, যথা তরু হিমানীবিহনে
 নবরস; পূর্ণশশী সুহাস আকাশে
 পূর্ণিমায়; কিষ্ণা পদ্ম, নিশা-অবসানে,
 প্রফুল্ল! দক্ষিণে রক্ষঃ বিভীষণ-বলী
 মিত্র, আর নেত্ যত—দুর্ধর্ষ সংগ্রামে,—
 70 দেবেন্দ্রে বেড়িয়া যেন দেবকূল-রথী!
 কহিল সংক্ষেপে বার্তা বার্তাবহ স্বরা;—
 “রক্ষঃকূলমন্ত্রী, দেব, বিখ্যাত জগতে,
 সারণ, শিবিরদ্বারে, সঙ্গীদল সহ;—
 কি আজ্ঞা তোমার, দাসে কহ নরমণি।”
 আদেশিলা রঘুবর, “আন স্বরা করি,
 বার্তাবহ, মন্ত্ৰিবরে সাদরে এ স্থলে।
 কে না জানে, দূতকূল অবধ্য সমরে?”

প্রবেশি শিবিরে তবে সরণ কহিলা —
 (বন্দি রাজপদযুগে) “রক্ষঃকূলনিধি
 রাবণ, হে মহাবাহু, এই ভিক্ষা মাগে
 80 তব কাছে, —“তিষ্ঠ তুমি সসৈন্যে এ দেশে
 সপ্ত দিন, বৈরিভাব পরিহরি, রথি!
 পুত্রের সৎক্রিয়া রাজা ইচ্ছেন সাধিতে
 যথাবিধি। বীরধর্ম পাল, রঘুপতি!—
 বিপক্ষ সুবীরে বীর সম্মানে সতত।
 তব বাহুবলে, বলি, বীরশূন্য এবে
 বীরযোনি স্বর্ণলঙ্কা! ধন্য বীরকূলে
 তুমি! শুভ ক্ষণে ধনুঃ ধরিলা, নৃমণি;
 অনুকূল তব প্রতি শুভদাতা বিধি;
 দৈববশে রক্ষঃপতি পতিত বিপদে;—
 90 পরমনোরথ আজি পুরাও, সুরথি।”
 উত্তরিলে রঘুনাথ,—“পরমারি মম,
 হে সারণ, প্রভু তব; তবু তাঁর দুঃখে
 পরম দুঃখিত আমি, কহিনু তোমারে!
 রাহুগ্রাসে হেরি সূর্যে কার না বিদরে
 হৃদয়? যে তরুরাজ জলে তাঁর তেজে
 অরণ্যে, মলিনমুখ সেও হে সে কালে!
 বিপদে অপর পর সম মম কছে,
 মন্ত্ৰিবর! যাও ফিরি স্বর্ণলঙ্কাধামে
 তুমি, না ধরিব অস্ত্র সপ্ত দিন আমি
 100 সসৈন্যে। কহিও, বুধ, রক্ষঃকূলনাথে,
 ধর্মকর্মে রত জনে কভু না প্রহারে
 ধার্মিক!” এতক কহি নীরবিলা বলী।
 নতভাবে রক্ষোমন্ত্রী কহিলা উত্তরি;—
 “নরকুলোত্তম তুমি রঘুকুলমণি;
 বিদ্যা, বুদ্ধি, বাহুবলে অতুল জগতে!
 উচিত এ কর্ম তব, শূন, মহামতি!
 অনুচিত কর্ম কভু করে কি সৃজন?
 যথা রক্ষোদলপতি নৈকেষয় বলী;

নরদলপতি তুমি, রাঘব! কুম্ভণে—
 110 ক্ষম এ আক্ষেপ, রথি, মিনতি ও পদে!—
 কুম্ভণে ভেটিলে দৌঁহা দৌঁহে রিপুভাবে!
 বিধির নির্বন্ধ কিছু কে পারে খণ্ডাতে?
 যে বিধি, হে মহাবাহু, সৃজিলা পবনে
 সিন্ধু-অরি; মৃগ-ইন্দ্রে গজ-ইন্দ্র রিপু;
 খগেন্দ্রে নাগেন্দ্রবৈরী; তাঁর মায়াছলে
 রাঘব রাবণ-অরি—দোষিব কাহারে?”
 প্রসাদ পাইয়া দ্রুত চলিলা সশ্বরে
 যথায় রাক্ষসনাথ বসেন নীরবে,
 তিতিয়া বসন, মরি নয়ন-আসারে,
 120 শোকাকার্ত! হেথায় আঞ্জা দিলা নরপতি
 নেতাবৃন্দে; রণসজ্জা ত্যজি কুতুহলে,
 বিরাম লভিলা সবে যে যার শিবিরে।
 যথায় অশোকবনে বসেন বৈদেহী,—
 অতল জলাধিতলে, হয় রে, যেমতি
 বিরহে কমলা সতী, আইলা সরমা—
 রক্ষঃকুলরাজলক্ষ্মী রক্ষাবধুবশে।
 বন্দি চরণারবিন্দ বসিলা ললনা
 পদতলে। মধুস্বরে শূধিলা মৈথিলী,—
 130 “কহ মোরে, বিধুমুখি, কেন হাহাকারে
 এ দুদিন পুরবাসী? শুনিনু সভয়ে
 রণনাদ সারাদিন কালি রণভূমে;
 কাঁপিল সঘনে বন, ভুকম্পনে যেন,
 দূর বীরপদভরে; দেখিনু আকাশে
 অগ্নিশিখাসম শর; দিবা-অবসানে,
 জয়-নাদে রক্ষঃসৈন্য পশিল নগরে,
 বাজিল রাক্ষসবাদ্য গম্ভীর নিষ্কণে!
 কে জিনিল? কে হারিল? কহ স্বরা করি,
 সরমে! আকুল মনঃ, হয় লো, না মানে
 140 প্রবোধ! না জানি হেথা জিজ্ঞাসি কাহারে?
 না পাই উত্তর যদি শূধি চেড়িলে।

বিকটা ত্রিজটা, সখি, লোহিতলোচনা,
 করে খরসান অসি, চামুন্ডারূপিনী,
 আইল কাটিতে মোরে গত নিশাকালে,
 ক্রোধে অন্ধা! আর চেড়ী রোধিল তাহারে;
 বাঁচিল এ পোড়া প্রাণ তেঁই, সুকেশিনি!
 এখনও কাঁপে হিয়া স্মরিলে দুষ্টারে!”
 কহিলা সরমা সতী সুমধুর ভাষে,—
 “তব ভাগ্যে, ভাগ্যবতি, হতজীব রণে
 ইন্দ্রজিত! তেঁই লঙ্কা বিলাপে এরূপে
 150 দিবানিশি। এত দিনে গতবল, দেবি,
 করুর-ঈশ্বরী বলী! কাঁদে মন্দোদরী;
 রক্ষঃকুলনারীকুল আকুল বিষাদে;
 নিরানন্দ রক্ষোরথী। তব পুণ্যবলে,
 পদ্মাক্ষি, দেবর তব লক্ষ্মণ সুরথী
 দেবের অসাধ্য কর্ম সাধিলা সংগ্রামে,—
 বধিলা বাসবজিতে — অজেয় জগতে!”
 উত্তরিলা প্রিয়স্বদা,—“সুবচনী তুমি
 মম পক্ষে, রক্ষোবধু সদা লো এ পুরে!
 ধন্য বীর-ইন্দ্র-কূলে সৌমিত্রিকেশরী।
 160 শুব ক্ষণে হেন পুত্রে সুমিত্রা শাশুড়ী
 ধরিলা সুগর্ভে, সই! এত দিনে বুঝি
 কারাগারদ্বার মম খুলিলা বিধাতা
 কৃপায়! একাকী এবে রাবণ দুর্মতি
 মহারথী লঙ্কাধামে। দেখিব কি ঘটে,—
 দেখিব আর কি দুঃখ আছে এ কপালে?
 কিছু শুন কান দিয়া! ক্রমশঃ বাড়িছে
 হাহাকারধনি, সখি।”— কহিলা সরমা
 সুবচনী,—“করুরেন্দ্র রাঘবেন্দ্র সহ
 করি সন্ধি, সিন্ধুতীরে লইছে তনয়ে
 170 প্রেতক্রিয়াহতু, সতি। সপ্ত দিবানিশি
 না ধরিবে অস্ত্র কেহ এ রাক্ষসদেশে
 বৈরিভাবে— এ প্রতিজ্ঞা করিলা নৃমণি

রাবণের অনুরোধে;— দয়াসিন্ধু, দেবি,
 রাঘবেন্দ্র! দৈত্যবালা প্রমীলা সুন্দরী—
 বিদরে হৃদয়, সাধি, ঝরিলে সে কথা!—
 প্রমীলা সুন্দরী ত্যজি দেহ দাহস্থলে,
 পতির উদ্দেশে সতী, পতিপরায়ণা,
 যাবে স্বর্গপুরে আজি! হর-কোপানলে
 হে দেবি, কন্দর্প যবে মরিলা পুড়িয়া
 মরিলা কি রতি সতী প্রাণনাথে লয়ে?”

কাঁদালা রাক্ষস বধু তিতি অশ্রুনিরে
 শোকাকুলা। ভবতলে মূর্তিমতী দয়া
 সীতারূপে, পরদুঃখে কাতর সতত,
 কহিলা — সজল আঁখি, সম্ভাষি সখীরে;—
 “কুম্ভণে জনম মম, সরমা রাক্ষসি!
 সুখের প্রদীপ, সখি, নিবাই লো সদা
 প্রবেশি যে গৃহে, হয়, অমঙ্গলারূপী
 আমি। পোড়া ভাগ্যে এই লিখিলা বিধাতা।
 নরোত্তম পতি মম, দেখ, বনবাসী!
 বনবাসী, সুলক্ষণে, দেবর সুমতি
 লক্ষণ! ত্যজিলা প্রাণ পুত্রশোকে, সখি,
 শ্বশুর! অযোধ্যাপুরী আঁধার লো এবে,
 শূন্য রাজসিংহাসন! মরিলা জটায়ু,
 বিকট বিপক্ষপক্ষে ভীমভূজবলে,
 রক্ষিতে দাসীর মান! হ্যাদে দেখ হেথা—
 মরিল বাসবজিৎ অভাগীর দোষে,
 আর রক্ষেরখী যত। কে পারে গণিতে?
 মরিবে দানববালা অতুলা এ ভবে
 সৌন্দর্যে! বসন্তারম্ভে, হয় লো, শুখাল
 হেন ফুল!” —“দোষ তব”—শুধিলা সরমা,
 মুছিয়া নয়নজল— “কহ কি, রূপসি?
 কে ছিঁড়ি আনিল হেথা এ স্বর্ণব্রততী,
 বঁটিয়া রসালরাজে? কে আনিল তুলি
 রাঘবমানসপত্র এ রাক্ষসদেশে?”

নিজ কর্মদোষে মজে লক্ষা-অধিপতি!
 আর কি কহিবে দাসী?” কাঁদালা সরমা
 শোকে! রক্ষঃকুলশোকে সে অশোক-বনে,
 কাঁদালা রাঘববাঁহা — দুঃখী পর-দুঃখে।

খুলিল পশ্চিম দ্বার অশনি-নিনাদে।
 বাহিরিল লক্ষ রক্ষঃ স্বর্ণদণ্ড করে,
 কৌষিক পতাকা তাহে উড়িছে আকাশে।
 রাজপথ-পার্শ্বদ্বয়ে চলে সারি সারি।
 নীরবে পতাকিকুল। সর্বাগ্রে দুন্দুভি
 করিপৃষ্ঠে পুরে দেশ গন্তীর আরবে।
 পদব্রজে পদাতিক কাতারে কাতারে;
 বাজীরাজী সহ গজ; রথীবৃন্দ রথে
 মৃদুগতি, বাজে বাদ্য সক্রুণ ঋণে!
 যত দূর চলে দৃষ্টি, চলে সিন্ধুমুখে
 নিরানন্দে রক্ষোদল! ঝক ঝক ঝকে
 স্বর্ণ-বর্ম ধাঁধি আঁখি! রবিকরতেজে
 শোভে হৈমধজদণ্ড; শিরোমণি শিরে;
 অসিকোষ সারসনে; দীর্ঘ শূল হাতে;
 বিগলিত অশুধারা, হয় রে, নয়নে!

বাহিরিল বীরাজনা (প্রমীলার দাসী)
 পরাক্রমে ভীমা-সমা, রূপে বিদ্যাধরী,
 রণবেশে;— কৃষ্ণ-হয়ে নৃমুণ্ডমালিনী,—
 মলিন বদন, মরি, শশিকলাভাবে
 নিশা যথা! অবিরল ঝরে অশুধারা,
 তিতি বস্ত্র, তিতি অশ্ব, তিতি বসুধারে!
 উচ্ছ্বাসিছে কোন বামা; কেহ বা কাঁদিছে
 নীরবে; চাহিছে কেহ রঘুসৈন্যপানে
 অগ্নিময় আঁখি রোষে, বাঘিনী যেমনি
 (জালাবৃত) ব্যাধবর্গে হেরিয়া অদুরে!
 হয় রে, কোথা সে হাসি— সৌদামিনী-ছটা!
 কোথা সে কটাক্ষশর, কামের সমরে
 সর্বভেদী? চেড়ীবৃন্দ মাঝারে বড়বা,

240 শূন্যপৃষ্ঠ, শোভাশূন্য, কুসুম বিহনে
 বৃত্ত যথা! টুলাইছে চামর চৌদিকে
 কিঞ্চকরী; চলিছে সঙ্গে বামাব্রজ কাঁদি 270
 পদব্রজে; কোলাহল উঠিছে গগনে!
 প্রমীলার বীরবেশ শোভে ঝলঝলে
 বড়বার পৃষ্ঠে,— অসি, চর্ম, তুণ, ধনুঃ,
 কিরীট, মণ্ডিত, মরি, অমূল্য রতনে!
 সারসন মণিময়; কবচ খচিত
 সুবর্ণে,— মলিন দৌহে। সারসন ঝরি,
 হয় রে, সে সরু কটি! কবচ ভাবিয়া
 সে সু-উচ্চ কূচয়ুগে — গিরিশৃঙ্গসম!
 ছড়াইছে খই, কড়ী, স্বর্ণমুদ্রা আদি
 অর্থ, দাসী; সক্রুণে গাইছে গায়কী; 280
 পেশল-উরস হানি কাঁদিছে রাক্ষসী!
 বাহিরিলা মৃদুগতি রথবন্দ মাঝে
 রথবর, ঘনবর্ণ, বিজলীর ছটা
 চক্রে; ইন্দ্রচাপরূপী ধ্বজ চূড়দেশে;—
 কিছু কান্তিশূন্য আজি, শূন্যকান্তি যথা
 প্রতিমাপঞ্জর, মরি, প্রতিমা বিহনে
 বিসর্জন-অন্তে!— কাঁদে ঘোর কোলাহলে
 রক্ষোরথী, ক্ষণ বক্ষঃ হানি মহা ক্ষেপে
 হতজ্ঞান! রথমধ্যে শোভে ভীম ধনুঃ,
 তুণীর, ফলক, খড়্গ শঙ্খ, চক্র, গদা—
 260 আদি অস্ত্র; সুকবচ; সৌরকর-রাশি-
 সদৃশ কিরীট; আর বীরভূষা যত।
 সক্রুণ গীতে গীতি গাইছে কাঁদিয়া
 রক্ষোদুঃখ! স্বর্ণমুদ্রা ছড়াইছে কেহ,
 ছড়ায় কুসুম যথা লড়ি ঘোর ঝড়ে
 তরু! সুবাসিত জল ঢালে জলবহ,
 দমি উচ্চগামী রেণু, বিরত সহিতে
 পদভর। চলে রথ সিংহুতীরমুখে।

সুবর্ণ-শিবিকাসনে, আবৃত কুসুমে,
 বসেন শবের পাশে প্রমীলা সুন্দরী,—
 মর্ত্যে রতি মৃত কাম সহ সহগামী!
 ললাটে সিন্দুর-বিন্দু, গলে ফুলমালা,
 কঙ্কণ মৃগালভুজে; বিবিধ ভূষণে
 ভূষিতা রাক্ষসবধু। টুলাইছে কাঁদি
 চামরিণী সূচামর, কাঁদি ছড়াইছে
 ফুলরাশি বামাবন্দ। আকুল বিষাদে,
 রক্ষঃকুল-নারীকুল কাঁদে হাহারবে।
 হয় রে, কোথা সে জ্যোতিঃ ভাতিত যে সদা
 মুখচন্দ্রে? কোথা, মরি, সে সূচারু হাসি,
 মধুর অধরে নিত্য শোভিত যে, যথা
 দিনকর-কররাশি তোর বিষাধরে,
 পঞ্চজিনি? মৌনব্রতে ব্রতী বিধুমুখী—
 পতির উদ্দেশে প্রাণ ও বরাঙ্গ ছাড়ি
 গেছে যেন যথা পতি বিরাজেন এবে!
 শুখাইলে তরুরাজ; শুখায় রে লতা,
 সয়ম্বরী বধু ধনী। কাতারে, কাতারে,
 চলে রক্ষোরথী সাথে, কোষশূন্য অসি
 করে, রবিকর তাহে ঝলে ঝলঝলে,
 কাণ্টন-কণ্ঠক-বিভা নয়ন ঝলসে।
 উচ্চে উচ্চারয়ে বেদ বেদজ্ঞ চৌদিকে;
 290 বহে হবির্বহ হোত্রী মহামন্ত্র জপি;
 বিবিধ ভূষণ, বস্ত্র, চন্দন, কস্তুরী,
 কেশর, কুঙ্কুম, পুষ্প বহে রক্ষোবধু
 স্বর্ণপাত্রে; স্বর্ণকুন্তে পূত অস্তোরশি
 গাঞ্জোয়। সুবর্ণদীপ দীপে চারি দিকে।
 বাজে ঢাক, বাজে ঢোল, কাড়া কড়কড়ে;
 বাজে করতাল, বাজে মৃদঙ্গ, তুষকী;
 বাজিছে ঝাঁঝরী, শঙ্খ; দেয় হুলাহুলি
 সধবা রাক্ষসনারী আর্দ্র অশ্রুণীরে—
 হয় রে, মঞ্জলধনি অমঞ্জল দিনে!

300 বাহিরিলা পদব্রজে রক্ষঃকুলরাজা
 রাবণ;— বিশদ বস্ত্র, বিশদ উত্তরি,
 ধুতুরার মালা যেন ধূর্জটির গলে;—
 চারি দিকে মগ্নিদল দূরে নতভাবে।
 নীরব কর্বুরপতি, অশ্রুপূর্ণ আঁখি,
 নীরব সচিববৃন্দ, অধিকারী যত
 রক্ষঃশ্রেষ্ঠ। বাহিরিল কাঁদিয়া পশ্চাতে
 রক্ষোপুরবাসী রক্ষঃ—আবাল, বনিতা,
 বৃন্দ; শূন্য করি পুরী, আঁধারে রে এবে
 গোকুলভবন যথা শ্যামের বিহনে!
 310 ধীরে ধীরে সিংধুমুখে, তিত্তি অশ্রুনিরে,
 চলে সবে, পুরি দেশ বিষাদ-নিিনাদে!
 কহিলা অঞ্জদে প্রভু সুমধুর স্বরে—
 “দশ শত রথী সঙ্গে যাও, মহাবলি
 যুবরাজ, রক্ষঃ সহ মিত্রভাবে তুমি,
 সিংধুতীরে! সাবধানে যাও, হে সুরথি!
 আকুল পরাণ মম রক্ষঃকুলশোকে!
 এ বিপদে পরাপর নাহি ভাবি মনে,
 কুমার! লক্ষ্মণ-শুরে হেরি পাছে রোষে,
 320 পূর্বকথা স্মরি মনে কর্বুরাধিপতি,
 যাও তুমি, যুবরাজ! রাজচূড়ামণি,
 পিতা তব বিমুখিলা সমরে রক্ষসে,
 শিষ্টাচারে, শিষ্টাচার, তোষ তুমি তারে!”
 দশ শত রথী সাথে চলিলা সুরথী
 অঞ্জদ সাগরমুখে। আইলা আকাশে
 দেবকুল;— ঐরাবতে দেবকুলপতি,
 সঙ্গে বরাঙ্গনা শচী অনন্তযৌবনা,
 শিখিধজে শিখিধজ স্বন্দ তারকারি
 সেনানী; চিত্রিত রথে চিত্ররথ রথী,
 মুগে বায়ুকুলরাজ; ভীষণ মহিষে
 330 কৃতান্ত; পুষ্পকে যক্ষ; অলকার পতি;—
 আইলা রজনীকান্ত শান্ত সুধানিধি,

মলিন তপনতেজে; আইলা সুহাসী
 অশ্বিনীকুমারযুগ, আর দেব যত।
 আইলা সুরসুন্দরী, গন্ধর্ব, অঙ্গসরা,
 কিম্বর, কিম্বরী। রঞ্জে বাজিল অম্বরে
 দিব্য বাদ্য। দেব-ঋষি আইলা কৌতুকে,
 আর আর প্রাণী যত ত্রিদিবনিবাসী।
 উত্তরি সাগরতীরে, রচিলা সঙ্ঘরে
 যথাবিধি চিত্তা রক্ষঃ বহিল বাহকে
 340 সুগন্ধ চন্দনকাষ্ঠ, ঘৃত ভারে ভারে।
 মন্দাকিনী-পূতজলে ধুইয়া যতনে
 শবে, সুকৌষিক বস্ত্র পরাই, থুইল
 দাহস্থানে রক্ষোদল; পড়িলা গম্ভীরে
 মন্ত্র রক্ষঃ-পুরোহিত। অবগাহি দেহ
 মহাতীরে সাধী সতী প্রমীলা সুন্দরী
 খুলি রত্ন-আভরণ, বিতরিলা সবে।
 প্রণমিয়া গুরুজনে মধুরভাষিণী,
 সম্ভাষি মধুরভাষে দৈত্যবালাদলে,
 কহিলা— “লো সহচরি, এত দিনে আজি
 350 ফুরাইল জীবলীলা জীবলীলাস্থলে
 আমার। ফিরিয়া সবে যাও দৈত্যদেশে!
 কহিও পিতার পদে এসব বারতা,
 বাসন্তি! মায়েরে মোর”— হয় রে, বহিল
 সহসা নয়নজল! নীরবিলা সতী,—
 কাঁদিল দানববালা হাহাকার রবে!
 মুহূর্তে সঙ্ঘরি শোক, কহিলা সুন্দরী
 “কহিও মায়েরে মোর, এ দাসীর ভালে
 লিখিলা বিধাতা যাহা, তাই লো ঘটিল
 এত দিনে! যাঁর হাতে সঁপিলা দাসীরে
 360 পিতা মাতা, চলিনু লো আজি তাঁর সাথে,—
 পতি বিনা অবলার কি গতি জগতে?
 আর কি কহিব, সখি? ভুল না লো তারে—
 প্রমীলার এই ভিক্ষা তোমা সবা কাছে!”

চিতায় আরোহি সতী (ফুলাসনে যেন!)
 বসিলা আনন্দমতি পতি-পদতলে;
 প্রফুল্ল কুসুমদাম কবরী-প্রদেশে।
 বাজিল রাক্ষসবাদ্য; উচ্চে উচ্চারিল
 বেদ বেদী; রক্ষানারী দিল হুলাহুলি;
 370 সে রবের সহ মিশি উঠিল আকাশে
 হাহারব! পুষ্পবৃষ্টি হইল চৌদিকে।
 বিবিধ ভূষণ, বস্ত্র, চন্দন, কস্টুরী
 কেশর, কুঙ্কুম-আদি দিল রক্ষাবালা
 যথাবিধি; পশুকুলে নাশি তীক্ষ্ণ শরে
 ঘটাত্ত করিয়া রক্ষঃ যতনে থুইল
 চারি দিকে; যথা মহানবমীর দিনে,
 শাক্ত ভক্ত-গৃহে, শক্তি, তব পীঠতলে!
 অগ্রসরি রক্ষো রাজ কহিলা কাতরে;
 “ছিল আশা, মেঘনাদ, মুদিব অস্তিমে
 380 এ নয়নদ্বয় আমি তোমার সম্মুখে,—
 সঁপি রাজ্যভার, পুত্র, তোমায়, করিব
 মহাযাত্রা! কিন্তু বিধি — বুঝিব কেমনে
 তাঁর লীলা? ভাঁড়াইলা সে সুখ আমারে।
 ছিল আশা, রক্ষঃকুল-রাজ-সিংহাসনে
 জুড়াইব আঁখি, বৎস, দেখিয়া তোমারে,
 বামে রক্ষঃকুললক্ষ্মী রক্ষোরাণীরূপে
 পুত্রবধু! বৃথা আশা! পূর্বজন্মফলে
 হেরি তোমা দৌঁহে আজি এ কাল-আসনে!
 কর্বুর-গৌরব-রবি চির রাহুগ্রাসে।
 সেবিনু শিবেরে আমি বহু যত্ন করি,
 390 লভিতে কি এই ফল? কেমনে ফিরিব,—
 হয় রে, কে কবে মোরে, ফিরিব কেমনে
 শূন্য লঙ্কাধামে আর? কি সাঙ্ঘনাছলে
 সাঙ্ঘনিব মায়ে তব, কে কবে আমারে?
 ‘কোথা পুত্র, পুত্রবধু আমার?’ শুধিবে
 যবে রানী মন্দোদরী,— ‘কি সুখে আইলে

রাখি দৌঁহে সিংধুতীরে, রক্ষঃকুলপতি?’ —
 কি কয়ে বুঝাব তারে? হয় রে, কি কয়ে?
 হা পুত্র! হা বীরশ্রেষ্ঠ! চিরজয়ী রণে
 হা মাতঃ রাক্ষসলক্ষ্মি! কি পাপে লিখিলা
 400 এ পীড়া দারুণ বিধি রাবণের ভালে?”
 অধীর হইলা শুলী কৈলাস-আলয়ে!
 লাড়িল মস্তকে জটা, ভীষণ গর্জনে
 গর্জিল ভূজঙ্গবন্দ, ধক ধক ধকে
 জ্বলিল অনল ভালে; ভৈরব কল্লোলে
 কল্লোলিলা ত্রিপথগা, বরিষায় যথা
 বেগবতী স্রোতস্বতী পর্বতকন্দরে।
 কাঁপিল কৈলাসগিরি থর থর থরে।
 কাঁপিল আতঙ্কে বিশ্ব; সভয়ে অভয়া
 কৃতাঞ্জলিপুটে সাধী কহিলা মহেশে;
 “কি হেতু সরোষ, প্রভু, কহ তা দাসীরে?
 মরিল সমরে রক্ষঃ বিধির বিধানে;
 নহে দোষী রঘুরথী! তবে যদি নাশ
 অবিচারে তারে, নাথ, কর ভস্ম আগে
 আমায়!” চরণযুগ ধরিলা জননী।
 সাদরে সতীরে তুলি কহিলা ধূর্জটি;—
 “বিদরে হৃদয় মম, নগরাজভালে,
 রক্ষোদুঃখে! জান তুমি কত ভালবাসি
 নৈকশেষে শুরে আমি! তব অনুরোধে,
 ক্ষমিব, হে ক্ষেমঙ্করি, শ্রীরাম লক্ষ্মণে।”
 420 আদেশিলা অগ্নিদেবে বিষাদে ত্রিশূলী;
 “পবিত্রি, হে সর্বশুচি, তোমার পরশে,
 আন শীঘ্র এ সুধামে রাক্ষসদম্পতী।”
 ইরম্মদরূপে অগ্নি ধাইলা ভূতলে!
 সহসা জ্বলিল চিতা। সচকিতে সবে
 দেখিলা আগ্নেয় রথ; সুবর্ণ-আসনে
 সে রথে আসীন বীর বাসববিজয়ী

দিব্যমূর্তি! বাম ভাগে প্রমীলা রূপসী,
অনন্ত যৌবনকান্তি শোভে তনুদেশে;
চিরসুখহাসিরাশি মধুর অধরে!

430

উঠিল গগনপথে রথবর বেগে;
বরষিলা পুষ্পাসার দেবকুল মিলি;
পুরিল বিপুল বিশ্ব আনন্দ-নিনাদে!
দুগ্ধাধারে নিবাইল উজ্জ্বল পাবকে
রাক্ষস! পরম যত্নে কুড়াইয়া সবে
ভস্ম, অমুরাশিতলে বিসর্জিলা তাহে।
ধৌত করি দাহস্থল জাহ্নবীর জলে
লক্ষ রক্ষণশিল্পী আশু নির্মিল মিলিয়া
স্বর্ণ-পাটিকেলে মঠ চিতার উপরে;—
ভেদি অভ্র, মঠচূড়া উঠিল আকাশে।

440

করি স্নান সিন্ধুনীরে, রক্ষোদল এবে
ফিরিলা লঙ্কার পানে, আর্দ্র অশ্রুনীরে—
বিসর্জি প্রতিমা যেন দশমী দিবসে
সপ্ত দিবানিশি লঙ্কা কাঁদিলা বিষাদে।

ইতি শ্রীমেঘনাদ বধে কাব্যে সংস্ক্রিয়া নাম
নবমঃ সর্গঃ।

বাংলা থেকে রোমান হরফ, কাগজে:



অমিতা ভট্টাচার্য্য

কাগজ থেকে হার্ড-ডিস্ক



সংযুক্তা কাঁহার

<http://www.iopb.res.in/~somen/madhu.html>
[email:somen@iopb.res.in](mailto:somen@iopb.res.in)
